

14. april 2015

Aningaasaqarnermut Aatsitassanullu Naalakkersuisoq,
Maani

UPA 2015/85 pillugu tapiliussatut apeqqutit: Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaattut siunnersuut

Inatsisinut Ataatsimiititaliap siusinnerusukkut apeqqutaanut Naalakkersuisullu taakkununga akissutaannut tapiutitut Naalakkersuisut apeqqutinut ukununga akissuteqarnissaannik Inatsisinut Ataatsimiititaliamit qinnuigineqarput:

1. Inatsisinut Ataatsimiititaliap paasinninnera malillugu timimut scannerutip Naalakkersuisunit pissarsiarissallugu isumaliutigineqartup scannerneqartumut kanngunarsinnaasumik paquminarsinnaasumillu timip atortui nuisittassanngilai, taamaammallu taassuma ilisarnarunnaarsaatini atortulersuusernissaa angalasullu ulluinnarni inuunerisa illersorneqarnissaat pillugu malittarisassanik atuutsilersitsinissaq pisariaqanngitsutut nalilerneqartut. Naalakkersuisut tanmanna upernarsarsinnaavaat?
2. Inoqarneris qinngornerit røntgeniusut atorlugit scannerneqarnikkut peqqinnissakkut ulorianartorsiuleratarsinnaasunik Inatsisinut Ataatsimiititaliap Naalakkersuisunut apeqqutigivaa, taamaattoqarsimappallu taakku illersorumallugit maleruagassanik sunik Naalakkersuisut atuutsilersitsiniarnersut. Naalakkersuisut akissutaat malillugu Københavnip timmisartoqarfiani timimut scannerutip atornissaanut ilitsersuut malillugu naartusunik meeqqanillu 15-it inorlugit ukiulinnik scannerneqaqqusaanngillat, Naalakkersuisullu malittarisassanik taakkununga assingusunik atuutsilersitsiniarput. Ataatsimiititaliap akissut ima paasivaa, tassa qinngornerit røntgeniusut atorlugit scannerineq inuit ilaannut, assersuutigalugu kræftimik eqqorneqarsimasunut katsorsartikkiartorlutik katsorsartereerlutilluunniit angalasunut immikkut ulorianaateqanngitsutut Naalakkersuisunit nalilerneqartuq. Naalakkersuisut tamatuminnaga ilumoorneraasinnaappat?
3. 15-it inorlugit ukiullit scannerneqarsinnaannginnerat pillugu malittarisassap atuutsilersinneqarneratigut, siunertarineqartumut uniuissitsisumik ikiaroorartumik

eqqussuisunit meeqqat ikiaroorntumik toqqorsivigalugit eqqussuisutut atornerlunneqalernerannik nassataqarsinnaanera annilaanngatigineqarsinnaavoq. Ajornartorsiummut tassunga Naalakkersuisut qanoq oqaasissaqarpat?

4. Qassinik ukioqarnissamik killiliussaq qanoq appasitsigisunngorlugu inissinneqarpat timimik scannerineq peqqinnissakkut ulorianartorsiortitsisutut siunnersuutigineqarsinnaanngitsutullu Naalakkersuisunit nalilerneqassava.
5. Inuit tunngavissaqartumik pasineqartut malittarisassalli Naalakkersuisunit aalajangersarneqartut malillugit timimut scannerut atorlugu misissorneqarsinnaanngitsut (tassani assersuutigalugu naartusut) qanoq iliorluni misissorneqartassappat? Taakku ullumikkutut assaat atorlugit timimikkut misissorneqassappat?
6. Timimut scannerutip aalajangersimasup pissarsiariniarlugu isumaliutigineqartup akia inatsimmut nassuiaatini paasissutissiissutigineqartutut 800.000 kr-iunani 1,6 mio. kr-iussasoq ilimanarnerusoq ataatsimiititaliap apeqqutaanit Naalakkersuisullu akissutaanni erserpoq. Akisunerunera 2015-imut Aningaasut Inatsisissatut siunnersuummut allannguutissatut siunnersuummik saqqummiussisoqarnissaata pisariaqalerneranik nassataqassava?
7. Malittarisassani atuuttuni (nioqqutissanik eqqussuineq annissuinerlu pillugit Inatsisartut inatsisaanni § 30, imm. 4) Inuit akitsuuteqarfiusumut tikittut imalt. aallalersut, aningaasanik akiliutinillu atoriaannarnik 15.000 euro sinnerlugu nalilinnik nassataqartut peqquneqaqqaaratik unissapput misissortillutillu akileraaruseriffimmeersunullu aningaasat akiliutillu atoriaannaat tamaasa nalunaarutigissallugit pisussaapput. Inunnut suliffeqarfinnut il.il. Kalaallit Nunaata avataanut 15.000 euronik amerlanerusunilluunniit naleqartunik nassiussisunut nunamilluunniit Kalaallit Nunaata avataaneersumit nassiussarsisunut tunngatillugu, taakkununga tamanna pillugu akileraaruseriffimmut paasissutissiinissamut pisussaaffik taamaattoq Inatsisissatut siunnersuummik eqqunneqassaaq.

15.000 euro ullutsinni 110.000 kr-it missaannik naleqarput. Aningaasat amerlassusissaannut killiliussanik assinginik aningaasanik peqquserlulluni "malunnarunnaarsaasarnermut" inatsimmi aalajangersagaqarpoq.

Pinerluuteqarluni aningaasarsianik (assersuutigalugu hashimik tuniniaalluni isertitanik) pinerluuteqarnermiluunniit atugassanik (assersuutigalugu hashimik pisinissamut) nuussisinnaanerup pinaveersimatinnissaa malittarisassani atuuttuni § 30, imm. 4-mik siunnersuutigineqartumilu § 30, imm. 5-imik siunertaavoq.

Aningaasat tigoriaannaat 100.000 kr-init amerlanerusunik nalillit, inuit angalasut nalinginnaasumik nassatarisinnaasaannit amerlanerungaatsiartutut isummerfigineqarsinnaapput, aningaaseriviillu saniatigut aningaasanik taamak amerlatigisunik nassiussatut nassitsisinnaasut amerlavallaarunangillat.

Aningaasanut nassatarisinnaasanut 15.000 euronut killiliineq sumik tunngaveqarpa, appasinnerusumut killiliineq pinerlutsaaliuinerlut iluaqutaanerussanngila?

8. Assersuutigalugu suliffeqarfik nunami allamiittoq aningaasanik 15.000 euronit amerlanerusunik suliffeqarfimmut Kalaallit Nunaanniittumut nassiussippat, aningaasat

qanoq amerlatiginerannik akileraaruseriffimmut paasissutissiinissamut sorleq pisussaaffeqarpa, nassiusisoq imaluunniit nassiussarsisoq (imaluunniit tamarmik)?

9. Inatsisissatut siunnersuutip aappassaaneerseqarnissaanut Naalackersuisut allannguutissatut siunnersuummik saqqummiussipput. Allannguutissatut siunnersuutip nassatarissavaa sanaartornissamik pisatsersuinissamillu akileraaruseriffiup umiarsualivinnut timmisartoqarfinnullu piumasaqaateqarsinnaalernera, tassani aamma ininik allanillu akileraaruseriffiup ilaasunik misissuiffissaanik atugassiisoqarnissaanut, taamatut aamma usingiaaffinni usilersorfinnilu suliffiusinnaasunik assersukkanik atugassiisoqarnissaanik piumasaqaateqarnissamut. Talittarfiit mittarfiillu piumasaqaatinik naammassinnissinnaanngippata, nioqqutissanik usingiaaneq usilersornerlu taamatutaaq ilaasussanik ikisoqarsinnaanera ilaasunillu niusoqarsinnaanera akileraaruseriffiup itigartitsissutigisinnaavaa.

Akileraaruseriffiup piumasaqaataasa naammassineqarnissaanut aningaasartuutit pisinnaasut talittarfimmit timmisartoqarfimmillu pineqartumit namminermit akilerneqassasut allannguutissatut siunnersuummit taassumumunngalu nassuiaatini ersepoq (tassungalu aningaasartuutip naggataanut atuisunit akilerneqarnissaa ilimagisariaqarpoq).

Allannguutissatut siunnersuutip pisortanut inuussutissarsiutinillu ingerlatsisunut aningaasaqarnikkut allaffissornikkullu kinguneqarnissaa pillugu nassuiaateqaqqullugit Naalackersuisut qinnuigineqarput.

Tusarniaaneq pillugu

Inatsimmut nassuiaatini nalinginnaasuni immikkoortoq 8-mi nassuiaatigineqarpoq, inatsisissatut siunnersuut oqartussaasunut kattuffinnut il.il. ukuusunut tusarniaassutigineqarsimasoq:

KANUKOKA, Kalaallit Nunaanni Sulisitsisut Peqatigiiffiat (GA), NUSUKA, S.I.K., KNAPK, KPMG Grønland, Deloitte, Grønlands Revisionskontor, Aalisarnermut, Piniarnermut Nunalerinermullu Naalackersuisoqarfik, Inuussutissarsiornermut, Aatsitassaqarmut Suliffeqarnermullu Naalackersuisoqarfik aamma Kalaallit Nunaanni Politimestereqarfik.

Aamma inatsisissatut siunnersuut Naalackersuisut nittartakkakut tusarniaavianni tamanut saqqummiunneqarpoq

Mittarfeqarfiit timmisartuutileqatigiiffiillu Kalaallit Nunaannik timmisartuussisartut tusarniarneqarnissaannik Naalackersuisut pisariaqartitsisimannginnerat sumik tunngaveqarnersoq pillugu Inatsisinut Ataatsimiititaliap Naalackersuisunut apeqqutigivaa.

Tamatumunnga Naalackersuisut ima akissuteqarput:

Inatsisip piareersarneqarneranut atatillugu tusarniaassutissat Naalackersuisut Ineqarnermut, Sanaartornermut Attaveqarnermullu Naalackersuisoqarfimmut, timmisartuutileqatigiiffiit susassaqtartut ingerlatsiviillu taakkununga attuumassuteqartut tusarniar-

neqartariaqarnerannik/ilisimatinneqartariaqarnerannik naliliisussamut pisarneq malillugu nassiuppaat. Aningaasaqarnermulli Naalackersuisoqarfik isumaqanngilaq apeqqut taannarpiaq timmisartuutileqatigiiffiit susassarigaat.

Tamanna pillugu Inatsisinut Ataatsimiititaliamit oqaatigineqartariaqarpoq inatsimmut nassuiaatini nalinginnaasuni immikkoortoq 8-mi oqartussaasut il.il. tusarniaaffigineqarsimasut nalunaarsorneqarfianni Ineqarnermut, Sanaartornermut Attaveqarnermullu Naalackersuisoqarfik ilanngunneqarsimanngimmat.

Akilerartarnermut Aqutsisoqarfik, timmisartuutileqatigiiffiit timmisartoqarfimmi billetsinut/inniminniinernut nalunaarsuiffii iserfigalugit ilaasut pillugit paasissutissanik takunnissinnaanissamik piumasaqarnissamut inatsisissatut siunnersuutikkut periarfissaqalissaaq. Peqatigisaanik Akilerartarnermut Aqutsisoqarfiup paasissutissanik attuumassuteqartunik pissarsinissaata tungaanut timmisartunik tikittunik uninngatitsisinnaanermut tunngavissiisoqarpoq. Tamanna tunngavigalugu timmisartuutileqatigiiffiit inatsisissamut siunnersuut pillugu tusarniarneqarnissaminik soqutiginnissinnaanerat ilimaginagu Aningaasaqarnermut Naalackersuisoqarfiup naliliisimanera Inatsisinut Ataatsimiititaliap paatsuunganartippaa.

Inatsisissatut siunnersuutip aappassaaneerneqarnissaanut Naalackersuisut allannguutissatut siunnersuummik saqqummiussipput. Talittarfiit timmisartoqarfiillu atortulersuutitigut pequtilersugaanikkullu pilersitsinissaannik akileraaruseriffiup piumasaqaateqarsinnaalernera allannguutissatut siunnersuutip nassatarissavaa, tassani aamma ininik allanillu akileraaruseriffiup ilaasunik misissuiffissaanik atugassiinissamut, soorlutaaq usingiaaffinni usilersorfinnilu suliffiusinnaasunik assersukkanik. Talittarfiit timmisartoqarfiillu piumasaqaatinik naammassinnissinnaanngippata, nioqqutissanik usingiaaneq usilersornerluunniit taamatuttaaq ilaasunik ikisoqarsinnaanera niusoqarsinnaaneraluunniit akileraaruseriffiup itigartitsissutigisinnaavaa.

Allannguutissatut siunnersuut Inatsisinut Ataatsimiititaliap paasinninnera malillugu tusarniaassutigineqanngilaq.

Illuatungeriit attuumassuteqartut allannguutissatut siunnersuummut tunngatillugu tusarniarneqarnissaat ataatsimiititaliap kissaatiginartippaa, taamatuttaaq Mittarfeqarfiit timmisartuutileqatigiillu Kalaallit Nunaannik timmisartuussisartut inatsisissatut siunnersuut pillugu tapiliullugu tusarniarneqarnissaat.

Taamaammat sapaatip akunnerini marlunni ingerlanneqartumik piaartumik tusarniaaqullugit Naalackersuisut ataatsimiititaliamit qinnuigineqarput, tusarniaanermilu akissutit Naalackersuisullu taakkununga oqaaseqaataat pillugit nassuiaammik ataatsimiititaliamut nassiusseqqullugit.

Inussiarnersumik inuulluaqqusillunga

Laura Tàunâjik

Inatsisinut Ataatsimiititaliamut Siulittaasoq

